

al portador al qual apartien; et a la Signoria non scrive nulla di cosse particular di guerra, ni di armata o per zifra, o a qualche modo.

Et fo *lettere di uno fator di Zuan di Stefani mercadante in questa terra, di 2 April*, li scrive mandi la nave con le robe et spera si farà bene; per le qual parole fo interpretato di armata non sarà nulla, et *maxime* contra la Signoria nostra.

In questa matina achadete cossa notanda, che se intese questa note esser morto sier Alvise Zen el provedador a le Biave, qu. sier Francesco, di anni . . . , qual eri fo fin 23 hore in loza a San Marco, cenò di bona voia, tolse una pirola solita perchè havia una streta di peto, et a hore 3 morite.

A dì 9, fo lettere di Udene, dil Luogotenente, di 7. Come quelle cosse di turchi e altri è risolte in niente, et se tien fusse zanza levata per il conte Bernardin Frangipani.

Fu leto una parte fata notar per sier Antonio Trun procurator savio dil Consejo, che il far di Consieri avanti el tempo per atender ai Colegi sia revochada. *Item*, li Consieri in scurtinio siano eleti con boletini; la qual si meteria il primo Pregadi, e poi in Gran Consejo.

Da poi disnar, fo Consejo di X con Zonta. Et prima, nel Consejo di X semplice assolseno li scrivani e altri di l'Arsenal che non pagaseno la mità dil neto, come li Provedadori sora i officii voleano farli pagar.

282* *Item*, con la Zonta preseno di restituir li ducati 300 dati per venir in Pregadi a sier Alvise di Prioli qu. sier Francesco, qual fo bandito per li Censori, *videlicet* ubligadi certo deposito di l'officio dil Sal di 1501.

Item, preseno dar certi danari di la camera di Treviso per le fabriche di quella città.

Item, asolseno il capitano di Agort, nominato Bortolo di Corte, qual havia falsifichato certo privilegio dil Consejo di X, et era stà retenuto e colejato e menato per l'Avogador. Justa el consueto posto di proceder, fu posto a l'incontro di asolverlo, et questa fu presa.

Item, spazono a Roma lettere per ditto Consejo di X con la Zonta. Volseno far scurtinio di 2 sora i fuogi, justa la parte presa, et per esser ora tarda non fu balotato.

A dì 10. La matina, se intese le galie di Alexandria, zoè la galia capitania, esser sora porto; et cussì da poi nona col colmo di l'acqua la introe. Et l'altra galia Zena è rimasta a Ruigno, nè ha fato la parenzana, come ha fato questa galia capetania.

Fo in Colegio il Doxe *solum* con do Consieri: sier Andrea Mudazo, sier Nicolò Venier. Li altri, zoè Alvise Mocenigo el cavalier, sier Hironimo da cha' da Pexaro e sier Sebastian Moro è andati a la villa, et sier Andrea Baxadona non vene in Colegio.

Di Palermo, fo leto do lettere di sier Pelegrin Venier qu. sier Domenego, di 14 April.

La prima di questo tenor: a di 28 dil passato scrisi quanto di l'armade se iudicava. Da poi, questi siciliani, veduto li fanti si haveano messi a sachizar alcuni casteli et baronie, preseno l'arme in mano, et li ysperi domandando soldo, non li essendo proveduto era per seguir alcun disordine, per modo non volendo ubedir ed imbarcarsi, lo illustrissimo Capitano zeneral prima ha fato poner in nave tutti li cavali che sono stati 1000 et più; et veduto li fanti non esser per esser lassati a la Fagagnana, et il dito Capitano per darli la paga fece prender tutti navilii carichi di formenti di mercadanti, dove sono salme 10 milia formenti, si dice volerli condur in Zerbi et pagarli. Con tal speranza se sono imbarcati, et tanto più che è fama preseno 12 mori di Zerbi, per i qual hanno inteso quella ixola esser in grande divisione, el Cieco vechio da una parte, et uno nepote suo da l'altra, et che pativano de vituarie, et come haveano mandato fuora di quel luogo li puti et done, et star con gran timore. Tal nova hanno molto inanimato tutti a andar volentiera. Sono fanti 5000, ancor dicono 7000, et 1000 homeni d'arme a la spagnola. Di Trapano va da 25 brigantini, da Malta da vele 283 25 latine fra fuste et gripi, et 1000 homeni dil regno sono reduti per far la massa a la Fagagnana; et se dice partirano, fata questa luna, per Zerbi. Portano presidii per fabricar un castelo a la Rocheta, et più sperano averla per accordo che per forza. Hanno *etiam* da 70 carete con artelarie menude. Nostro Signor li doni incruente vitoria. Dil successo aviserà. Formenti sono a tari 13; a la parte di mezo zorno la saxon prospera in bene. Hanno da barze 70 ben in ordine et 6 di le mior fu prima mandate in Galicia. In Corsica fu vedute fuste 8 de' infideli: che Nostro Signor le sconfondi.

Dil dito, di 22 April. Come per l'altra di 13 significoe di l'esser per partir l'armada, e come li fanti si haveano imbarcati, che certo sta volta si dubitava fusseno tutti tagliati a pezi a causa de li et danni haveano principiati a far. Lo illustrissimo zeneral, et con astuzia et con promessa li ha reduti, et sono partiti da la Fagagnana a di 16, la note, per l'ixola di Zerbi, et li tempi hanno mostrato perfeti per loro. Sono vele 130, barze 80, galie 6, fuste bri-